

Headlines

- 1 वक्फ संशोधन बिल-2025 गी पारित करने आस्तै विचार लेई लोकसभा च पेश कीता गेआ। चर्चा अजें जारी ऐ।
- 2 उपराज्यपाल होरें युवाएं गी राष्ट्र निर्माण च योगदान देने ते जीवन च सुधार आहने लेई अपने हुनर दा इस्तेमाल करने लेई प्रोत्साहित कीता।
- 3 व्हाईट नाइट कोर दे जी.ओ.सी होरें राजौरी सेक्टर दा दौरा लाया ते खित्ते दी सुरक्षा स्थिति दा जायजा लैता।
- 4 मुख् न्याधीश ताशी रबस्तान होरें जम्मू-कश्मीर ते लद्दाख च नशाखोरी दे खतरे कन्नै निब्बड़ने लेई इकजुट रौहने दा आह्वान कीता।
- 5 रियासी जिला अस्पताल नै जम्मू खित्ते च टॉप कीता ऐ ते फरवरी 2025 च केंद्र शासित प्रदेश च राष्ट्री सेहत रैंकिंग च चौथा थाहर हासल कीता ऐ।

<><><><><><>

Waqf

लोकसभा च वक्फ संशोधन विधेयक 2025 पर चर्चा होआरदी ऐ। संयुक्त संसदीय समिति इस विधेयक गी पैहले गै मंजूर करी चुकी दी ऐ। केंद्री अल्पसंख्यक मामलें दे मंत्री किरन रिजिजू होरें इस विधेयक गी पेश कीता। रिजिजू होरें आखेआ जे परामर्श प्रक्रिया सभ्भनें थवां लम्मी ऐ। 92 लक्ख 27 ज्हार याचिका ते ज्ञापन दस्ती ते ऑनलाइन सरिस्ते राहें हासिल होए न। उनें आखेआ जे 284 प्रतिनिधिमंडल जेदे च 25 राज्यें ते केंद्र शासित प्रदेशें दे वक्फ बोर्ड बी शामिल न, अपने विचार सांझा कीते।

मंत्री होरें आखेआ जे बिल वक्फ संपत्तिएं दे प्रबंधन गी बेहतर करने लेई ऐ।

<><><><><><>

LG-Alumini

उपराज्यपाल मनोज सिन्हा होरें अज्ज युवाएं गी राश्ट्र निर्माण च योगदान देने ते जीवन च सुधार आहने लेई अपने हुनर दा इस्तेमाल करने लेई प्रोत्साहित कीता। श्रीनगर च शारदा यूनिवर्सिटी दी अलुमनी मीट च अपने संबोधन दरान एल.जी होरें शैक्षिक संस्थानें दी तरक्की च पूर्व छात्रें दे महत्व आहले योगदान गी दस्सदे होई नेटवर्किंग, मेंटरशिप ते नालेज शेरिंग च उंदी अहम भूमिका उप्पर जोर दित्ता। एल.जी होरें पूर्व छात्रें गी रोल मॉडल मनने दे महत्व उप्पर लोऽ पाई ते मौजूदा विद्यार्थियों गी अपने लक्ष्य हासल करने ते समाज च सार्थक योगदान देने लेई प्रेरित कीता।

<><><><><><>

PM Shree Scholl Rajouri

शिक्षा गी बढ़ावा देने लेई राजौरी दे पी.एम श्री गौरमेंट हायर सेकेंडरी स्कूल ढांगरी नै स्कूल छोड़ी चुके दे बच्चें गी वापस स्कूल आहने लेई अभियान शुरू कीता। इस पैहलकदमी दा मकसद पी.एम श्री योजना दे फैयदे बारै लोकें गी जानकारी देना ऐ। स्कूल प्रशासन नै विद्यार्थियों कन्नै मिलियै इक्क रैली दा आयोजन कीता तां जे लोकें गी अपने बच्चें गी स्कूल भेजने ते केंद्र सरकार आसेआ बच्चें दी पढ़ाई लेई दित्ते गेदे मौकें दा पूरा फैयदा लैने लेई प्रोत्साहित कीता जाई सकै।

<><><><><><>

GoC-Visit

व्हाइट नाइट कोर दे जीओसी लेफ्टिनेंट जनरल पी.के मिश्रा होरें राजौरी सैक्टर दा दौरा लाया ते खित्ते दी सुरक्षा स्थिति दा जायजा लैता। उनें चुनौतीपूर्ण हालात च पेशेवराना रवैये अपनाई रखने लेई बलें दी सराहना कीती। व्हाइट नाइट कोर दे जीओसी ते Insurgency force दे जीओसी होरें मुख्यालयें दा दौरा लाया ते खित्ते दी मौजूदा सुरक्षा स्थिति दा आंकलन कीता। जीओसी होरें आतंकवाद रोधी अभियानें च साबका फौजिएं दे सहयोग दी बी सराहना कीती। उन्दा एहू दौरा पाकिस्तानी बलें आसेआ कीती गेदी संघर्ष विराम दी खलाफवर्जी पुंछ जिले आहली कब्जा रेखा कन्नै लगदे इलाकें च बरूदी सुरंग दा विस्फोट दे मगरा होआ ऐ। तोआई, कठुआ जिले च चला'रदे आतंकवाद रोधी अभियान गी होर व्यापक बनावे होई राजौरी जिले च बी तपाशी अभियान शुरू करी दित्ता ऐ। सुरक्षाबलें राजौरी जिले दे सीया बदरेई इलाके च व्यापक तपाशी अभियान रम्भ कीता ऐ। जम्मू-कश्मीर पुलस केंद्रीय रिजर्व पुलस बल ते सेना

आसेआ जंगली इलाके च तपाशी अभियान चलाया जा'रदा ऐ। बले आसेआ जंगलें ते खानाबदोश लोकें दे खाली घरें च तपाशी कीती जा'रदी ऐ।

<><><><><><>

CJ Drug Menance

जम्मू-कश्मीर ते लद्दाख दे हाई कोर्ट दे मुख न्याधीश ताशी रबस्तान होरें जम्मू-कश्मीर ते लद्दाख च बदधे नशाखोरी दे खतरें कन्नै निब्बडने लेई सहयोग ते इकजुट रौहने दा आह्वान कीता। जेएण्डके हाईकोर्ट बार एसोसिएशन आसेआ आयोजित इक सेमीनार च मुख परौहने दे तौरा उप्पर बोलदे होई उनें कनून कन्नै जुडे दे लोकें गी नशे कन्नै निब्बडने च सक्रिय भूमिका निभाने लेई आखेआ। इस मौके उप्पर उनें विद्यार्थियें गी शिक्षित करने लेई नमें तरीके बी सांझे कीते जिंदे च स्किट ते इंटरैक्टिव सैशन्स शामिल ना।

<><><><><><>

Rajouri Drug Peddler

नशे दे खलाफ इक महत्वपूर्ण कार्रवाई करदे होई राजौरी जिले दी जम्मू-कश्मीर पुलिस नै रजौरी दे वार्ड नंबर 2 दा रौहने आहला नशा तस्कर हारून रशीद दी संपत्ति गी अचैच करी लैता ऐ। जब्त कीती गेदी संपत्ति दी कीमत तकरीबन 50 लक्ख रपे ऐ। इसी नार्कोटिक ड्रग्स ते Psychotropic substance act दे तैहत अटैच कीता गेआ ऐ।

<><><><><><>

Reasi-Distt. Hospital

रियासी जिला अस्पताल नै इक बड़ी महत्व आहली उपलब्धि हासल करदे होई जम्मू डिविजन च टॉप कीता ऐ ते फरवरी 2025 च केंद्र शासित प्रदेश च राश्ट्री सेहत रैंकिंग च चौथा थाहर हासल कीता ऐ। मेडिकल सुप्रीटेंडेंट डॉ. गोपाल दत्त होरें इस सफलता दा श्रेय स्टाफ दे समर्पण भाव गी ते गुणवत्ता आहली सेहत सरबन्धी सेवाएं लेई उंदी प्रतिबद्धता गी दिता ऐ। उनें दस्सेआ जे सेहत सरबन्धी सेवाएं गी बदाने दे अपने लगातार जत्नें दे चलदे अस्पताल तौले गै 50 बिस्तरें आहला क्रिटिकल केयर यूनिट बी खोलने आहला ऐ।

<><><><><><>

Farmers-Gajansu

करसानें दी आजीविका गी बेहतर करने दे मकसद कन्नै सरकार आसेआ केई सारे जत्त शुरू कीते गेन। इन्दे तैहत करसानें गी माली सहायता बी उपलब्ध करोआई जंदी ऐ। करसानें सरकार दे जतनें दी सराहना कीती ऐ। करसान राई-बाई मैहकमे आसेआ वाजिव भाएं पर बी समेंसिर हासिल करी सकदे न। जम्मू दे गजनसू ग्रांऽ दे करसान नै कई सारी फसलें गी लाया ऐ ते औदे थवां लाहू बी हासल करा'रदा ऐ।

<><><><><><>